

第一名

劉惠月

撈起一個三歲子

得獎感言

母語是我的養分
大甲河是我的創作背景
感謝故鄉濃濃的人情味
感謝故鄉充足的灌溉圳
感謝評審團讀透我的心
讀透我寫下老圳的故事

當我腸枯思竭 無法提筆時
那曾經的故事向我招手
當我在茫茫字海裡迷路時
那自幼的母語向我指引路
於是，我有了繼續提筆的動力

大埔腔只有十幾萬人口
比原住民的阿美族少一半
與原住民的泰雅族相當
未來雖註定消失
我將繼續用文字讓它再撐一下
再撐一下



撈起一個三歲子

莊肚有三條灌溉用个大圳，厥等个歷史做下使得追溯到老清朝時，這兜係客家先民開莊時當重要个水路。其中一條盡大、盡闊个圳溝，流過吾奶屋家面頭前。屋家人出門只愛躡過一個戶檻，行無幾步腳斯摸得著圳溝水咧。圳溝又過繼續流往落，流過莊頭个石哀伯公，平時莊肚个老人家會在這位打牌、答嘴鼓，伯公生有做鬧熱个時，大自家會出錢出力共下搵鬧熱。圳溝水盡尾跔核楓樹伯公轉一個大彎，彎彎幹幹流出莊頭。到這滿，這條大圳个水流兩百外年咧，佢還繼續緊流、緊流。大圳親像當會唱歌个歌星，佢流往落个聲斯係幸福歌聲。

阿奶長在會在大圳脣洗衫褲，吾等細姪嚟無讀書个時間，歸陣細姪嚟真好跔緊阿奶在大圳脣搞水，細老弟還三歲忒等，佢乜好觸觸跔上跔落。好得這條大圳个水毋會當深，吾等這兜細嚟甥雙腳浸入圳溝肚搞水个時節，細老弟會在大圳脣緊看緊笑，佢又會用厥細細隻个手緊戽水，想愛撩大自家，佢笑、大家也跔佢笑，佢看佢應當真安全，毋會種落水寶肚，斯繼續同該陣細嚟甥共下搞水。

阿奶毋單淨會在大圳脣洗衫，佢也會在大圳脣洗菜。大菜大出个時，洗真多大菜來做鹹菜乾；菜頭大出時，佢又乜洗歸桶个菜頭，趕婆來做菜頭粿。無斯菜頭洗好了後，放在日頭下晒燥做菜脯。盡古董个事情係真多果子不時會對大圳上游緊打落來，成半下打幾下日都毋會煞鼓，比將講四、五月有桃會打落來，冬下時有柑會打落來，大梨乜會打落來。阿奶係做惜東西个人，佢毋會儘採耗爽食个東西，看緊一粒一粒賣相無好，毋過還食得个果子分果農擲撒，斯會帶大家在水个下向拈疏來，拈轉去滷滷嚟斯使得變一路好味瑞个嘴塔，吾等細嚟甥好食都耐毋得，輒輒緊討尾。

熱天時節日頭當烈，落大圳搞水當堵好。圳溝兩片有一空一空，吾等講該係老蟹空，也係黃鱔空，毋過乜有可能係蛇空。圳溝底除了有細石牯、石屎，也有真多濫膏糜，細亞毋堵好躡落去，腳斯真難擲出來。運氣好个時使得拈著螺廔，當然還使得覓蜆，該蜆係金黃金黃色个殼，色目正經當靚，若講大自家在日頭落山時節來覓蜆，該金黃色个日頭花晟核金黃色个蜆殼，吾等个世界黏時斯變金黃色，實在真幸福。

曉泅身个細亞斯盡好搞水，泅過个時水花會緊射緊激，激都佢歸身潦潦，細亞會笑面笑面詐同佢會失禮，害佢毋知愛笑抑係愛噉。細亞又過對水肚拈一粒又平又扁个石牯，拈跣來打水漂，彈都已遠著，該活潑又樂暢个畫面，到這滿佢還印象真清楚。佢感覺水底个石牯會行路，尤其係做大水个時，較大粒个石牯像會跳舞个樣，石牯對上游跳到下游，緊跳緊變身，緊跳緊細粒，盡尾變做細粒个沙，有兜石牯在轉彎位所會堆積變做肥泥，大部分个石牯斯直直流到大海，將吾等細亞對外背个夢想流往出，無定著吾等細亞會在外地實現細漢時个想望。

孱頭个細人會挑知在水肚打一粒大屁卵，水斯會大嫵聲bu bu滾，大家聽著恁泥恁漫畫个聲，相賽擗核肚屎笑都會搥，笑都吃吃滾，三歲个老弟看大家緊笑，佢也好擗擗緊笑，正經係矮牯看戲——跔人笑。閒時大家又會坐在大圳脣，聽風聲、聽水流動个聲、聽鳥噉聲、聽蟲唱歌，這款大自然个和聲使得講有影係「天籟」个聲。

該日，眾細亞同平時共款，雙腳浸在大圳肚，雙手辱水緊搞，搞都歡喜轟天咧，玄玄風佢聽著一聲「撲通」聲，咦！該係麼个聲？認真看真來，阿姆哀！三歲个老弟跌落水寶肚咧，佢毋知哪時行過來，自家一個人跔在大圳脣，可能係想愛學吾等辱水，忒細漢跔毋落，重心也抓毋著，嘎歸個人跌落水肚，這滿看現現，看著佢分水緊打緊流往落咧！哎哦！眾人還在搞水搞都

當大聲，根本無人知有人跌落水竇肚，仰結煞正好？佢又乜還恁細漢救毋著細老弟，佢高不將大大聲喊：「老弟跌落水肚咧，阿奶遽遽來救人哦！」。佢喊都抽骸另命个樣，這時節圳溝脣所有个細姪做下聽著佢求救个聲，毋過因致細姪做下浸在圳肚，水个重像有一種神力同大家抓纏纏，像係水鬼捉交替个力量，害大家毋得停動个樣，仰結煞正好？眾人緊張起來，毋過也記得愛求救兵，大自家大大聲拚命緊喊：「救人哦！細姪跌落水竇肚咧，危險啊！遽遽來救細姪哦！」。

好得該日阿奶在屋肚，佢聽著吾等大聲喊个聲，斯遽遽對灶下走出來，三步做兩步在圳溝脣走真遽，走去險險打倒拈。這個時節該種捉交替个魔力又像解除咧，逐儕做下使得停動，乜遽遽跳上來想愛俛過去救細老弟，毋過離細老弟忒遠救毋著，實在無結無煞！這個時節阿奶煞煞跳落水肚，趁細老弟對橋空底下流出來个時，遽遽同佢撈跣來，撈著个時間堵堵好，阿奶歡喜大聲喊：「撈著咧！救著咧，該載！該載！」，這時節企在脣項緊張个眾人，心肝肚个大石牯黏時放落來。

撈起來了後，歸身潦潦个細老弟面色壠青，目珠擘大大蕊，還孖孖爹爹，目珠仁又緊瞞緊瞞，嘴擘大大，慧慧毋知頭先到底發生麼个事情，做麼恁多人圍在厥身邊脣？當然佢也毋記得愛大聲噉咧！等分阿奶揸緊佢有五分鐘了後，魂已像倒轉來厥身體肚咧，佢正玄玄風放勢大聲噉、大聲唉，這滿佢正知好驚咧，安心个眾人這時節你一句、佢一句，緊拐細老弟：「乖哦！毋使驚，無事咧，分阿奶惜哦……」。其實講細老弟慧當也好，講佢孖爹也好，細老弟跌落水竇肚單淨略略嚇著忒等，人好好，像無事情發生个樣。

阿奶真勇敢同三歲个細老弟撈跣來，這件事情經過恁多年了後，大家逐擺見面講著這層事个時，眾人還係試著該係老弟命底真好，有影，該日細老弟實在運氣真好。想想咧！可比該日無人看著細老弟跌落水肚？可比該日阿奶無在屋家？可比該日阿奶無救著老弟？可比該日个橋真闊，細老弟一下斯

溜過去？可比細老弟真無膽，一跌落水寶肚斯開聲大噉？人若講一緊張身體斯硬鉸鉸，定著會沉落水寶，恁泥細老弟斯定著無法度放氣，無法度放氣了後……可比？又可比……恁多个可比？續落來毋知會發生麼个傷心事？毋知會白頭那毛人送烏頭那毛人無？也毋知會分大家一生人後悔、著切無？

逐擺轉到阿奶屋家，斯恁起阿奶屋家門頭前該條大圳，到這滿圳溝水還緊流無停，到這滿圳溝水還鮮鮮鮮，還覓得著細蜆子，又還使得用圳溝水洗衫褲、洗農作物這兜。這條鮮鮮个圳溝水頭擺識係吾等放學時節搞寮个所在，阿奶又識在下向个圳溝水撈著一個三歲子，這滿這個三歲子大漢咧，雖然佢毋知頭擺發生險險無命个危險事情，毋過細老弟毋會因致恁泥嘎真驚水性，顛倒佢係一個當好接近大自然个後生條，無論搞水、泅身、汨水、沒濟汨……。因致佢還細漢做細亞嗶時，識堵著水分佢个挑戰，所以佢顛倒毋驚水，顛倒在有閒時節輒輒接近水，這總下愛勞瀝阿奶，滂瀝阿奶佢勇敢撈起一個三歲子，分三歲子大漢了後使得延續對水淦淦个愛。